

## QUÆSTIO MEDICA.

Quodlibetariis disputationibus manè discutienda in Scholis Medicorum, die Jovis vigesima-sexta mensis Junii.

M. JOANNE GARBE, Doctore Medico, Præfide.

*An quodlibet temperamentum ut sua virtutes, sic suos habeat defectus?*

**C**ORPUS hominis animæ rationalis gratiâ conditum est non modo ut diversorium, verum etiam ut organum illius insitis viribus expromendis accommodatum; at ut ipsa est omnium formarum præstantissima, ita illius corpus pulcherrimâ conformatione est adornatum, ut divinæ mentis munere fungeretur; ea ratione tria obtinuit, quæ cæteris animantibus rerum natura denegavit; Primò figuram celsam & rectam quæ in cælum suumque conditorem se attollens coelestes igniculos & semina divinitatis suæ testatur; Secundo, cerebrum amplissimum animæ sedem, ut permultis functionibus edendis perfectius posset inservire; Tertiò, duas manus bellis denegatas obtinuit, quibus facile persequatur & comprehendat quæcumque anima rationalis voluerit imperare. Ex elementorum & humorum inter se confusorum mixtione & unione temperamenti ratio exurgit, at ea quod sit multiplex in diversis hominibus ex diversis actionibus nobis certò innoteceat; notæ enim sunt quibus unius cujusque naturalis status potest cognosci, at ut sunt quatuor humores pro singulari singulorum in quolibet homine exuperantiâ, sic temperamentum in genere in quadruplicem differentiam venit distinguendum, in sanguineum, biliosum, pituitosum, & melancholicum. Quodlibet autem ut suas virtutes, sic suos habere defectus licet profiteri.

**M**ELANCHOLICUS laboris patiens est, res altè penetrat, inexplorata indagat, parturit aliquando inopinata, facillè disquæ meditatur, studiis tenacius adhæret, & longâ mentis ruminatione quæsitâ invenit & digerit veritates; sed multiplici laborat defectu, vix mediocri pollet memoriâ, simulachra enim siccò cerebro non ita facillè imprimuntur, tædio non rarò languescit, sibi ipsi infensus, solitarius, taciturnus, contemplator, tenax, avarus, gestu, incessu, & voce gravis, tardior est in conceptibus formandis, ita uni parte addictus est, ut ab eâ divelli facillè non possit, hinc multa simul complecti non valet, nec ad disciplinas omnes animum applicare, quod tamen ab homine esset expetendum. Si humor melancholicus in majori copia exuperet, tunc ille nec in gaudii opportunitate hilarior, nec in tempestivis amœnitatibus alacrior videtur, sed quò foecilius cuncta blandiuntur, eò amarior fit & tristior, atque ubi semel terror invasit cum animi abiectione silet & juvat rebus tristioribus immorari, sicque suâ crassitie & frigidityte melancholia corporis & animi actionibus adversatur.

**B**ILIOSUS alacriter rem aggreditur & citò perficit, facillè invenit, difficultati non cedit, multo igne ardet, & luce splendet, mordacitas hujus humoris animum vellicat, sollicitat, & quasi scintillas elicit, uno verbo igneus est illi vigor, cujus foecunda vis multa & nova ex tenebris in lucem edit, sed hûic sua vita non desunt, cæco impetu fertur in præceps, corporis & animi motus vix celeriores & ad iram procliviores, judicio in multis peccat, multa per inadvertentiam omittit, eaque incautum subterfugiunt, quæ omittenda non essent, cæcâ rabie corripitur, ubi susceptæ res pro voto non succedunt, errorum suorum amantior est, quàm ut ab iis liberari possit, sicquæ sua sæpè turpia cerebri effluvia (quasi flos balsami esset) in præcio habet, aliorum contemptor, minimè ferendus, liberalior sui æstimator, in ipsâ rerum superficie & cute, fatui ad instar ignis excurrit, non verò altè scrutatur, ossa lingit, non frangit ut interiorum medullam gustet, aut certè si frangat, non terit, non coquit, non digerit, hinc non rarò immaturos & agrestes fructus producit.

**S**ANGUINEUS temperatior est, nec tanto fertur impetu quanto biliosus, nec tanto rigore obdurefcit quanto melancholicus, mirâ facilitate musis vacat, eodem semper mentis tenore incedit, non repit humi, non fertur in ardua, sed medium tractum obtinet, facetus, simplex, liberalis, tædio nunquàm afficitur, quia higit omnia quæ tædium asferre possunt, si plus æquo difficultas obstat ad alia statim se convertit, sed hæc omnia non sunt sine vitio, nec mediocritatem superant in quâ hominem ex voto se siltere non est optandum, qui non mediocriter doctus, sed omnibus artibus & disciplinis ediscendis capax & ingeniosus esse desideratur: ille est sapiens sensuum illecebris delusus, divinam auram in voluptatum fœcem immergens, sic ad eam, ad epulas, ad venerem proclivior, omnibus morbis à plenitudine obnoxius.

**P**ITUITOSUS mollis, docilis est & facillè duci ac flecti se finit, hinc non parum sub eximio Doctore proficere posset, nisi esset desidiosus, somnolentus, iners, stupidus & obliviosus; Pituita quæ in illo prædominatur frigida & humida ad omnes corporis & animi functiones est inepta. Ex multorum votis in quolibet homine illa esset melancholia expetenda, cujus frigiditatem suo ardore bilis accendat; siccitatem pituita humore suo diluat; & nimium austeritatis rigorem sanguis lentore suo castiget: sic illa bilis cujus nimium ardorem suâ frigiditate pituita imminuat, cæcum impetum suâ tarditate melancholia sistat & nativam acrimoniam sanguis suâ dulcedine leniat: sic illa pituita, cujus inertiam flava bilis suis stimulis excitet, melancholia verò fluiditatem suâ siccitate contineat, & sanguis suo melle insulsum saporem condiat; sic ille sanguis cujus levitatem melancholia gravitate suâ compenset, & bilis suo impetu debiliores vires extollat, hæc ratione ex illorum votis homo prærogativas haberet, omni scilicet ratione imminutam humorum exuperantiâ, auctamque illorum defectionem, sed graviter falluntur, nec est quod illam mediocritatem humorum proportionem desiderant, quam in hoc rerum statu minimè obtinere possunt, illa est purum mentis figmentum, nec potest propter qualitatum & humorum prædominium consistere in viventibus, in quibus tantum illud existit temperamentum, in quo major est perfectio quæ minus imperfectionis & defectus complectitur.

*Ergo quodlibet temperamentum ut suas virtutes, sic suos habet defectus.*

### DOMINI DOCTORES DISPUTATURI

M. Franciscus Verzeu.  
M. Claudius Puyson, Academiæ Censor.  
M. Claudius Berger.

M. Claudius Biendiscane.  
M. Dominicus de Farcy, Pharmacia Professor.  
M. Henricus Mahieu.

M. Claudius Guerin.  
M. Jacobus Renault.  
M. Franciscus Pijart, antiquior Scholæ Magister.

Proponcbat Parisiis PETRUS DE LA COUSTURE, Parisinus Baccalaureus Medicus. A. R. S. H. 1687.

